

2 TIMOTI

Pol kivuu kipihac wê vông yuu ge la vô Timoti

¹ A, Pol, Anutu vînoo a ên nêb a tu Yesu Kîlisi nu sinale. Ilage Anutu hîlu kiyang pyap bêga ên nêbê xomxo wê vông i vin Yesu ge obêc dô maviha luta lêc luta. Om Anutu xovô kiyang wê hîlu pyap ge di vông yuac sinale vô a ên nêb a la nêl Yesu Kîlisi kiyang kitong.

² Timoti, a kivuu kipihac tiga vô ông. Ông ge a nug vông vinên wê a xêgyaa vin lec ông ge. Mag Anutu hixôn il lig Apumtau Yesu Kîlisi, yuu i xo vîgwe pisiv ên ông di vông vîzid nivîha hixôn kiyang malehe i loc vô ông.

Il nid ob yoc ên xolac lêm

³ A mi timu vô Anutu môp di vông i yuac tiyi xochê a mage buge vông ilage, di nipaên ti o yêp vac a nilôg lêm. Timoti, a xo ông di a pimil Anutu ên ông vac kitaaên wê a kitaa vidiiên yuu bucên vihati ge.

⁴ Di a xo wê ông byag vô buc wê a sea ông ge, om a nêb a ob lôc vô ông i tii vac ên i vông a nilôg i vô nivîha.

⁵ A xovô ên a nêbê vông vinên wê ông vông ge nôn di o kityooên lêm. Ilage ông bum vêx Lois yuu tam Yunis vông i vin tibêge, om a xovô ên a nêbê gwêbaga vông vinên wê ông vông ge tiyi xochê yuu vông ge.

⁶ Om a ob nêl vô ông bê ông xovô xêkizêc wê Anutu vông vô ông ilage i tii vac. Ông kô xêkizêc tige vô buc wê a vyax vîgêg lec ông ge. Om gwêbaga ông kô xêkizêc tige di vông yuac ya.

⁷ Ên Anutu o vông môt xonaên vô il lêm. Nge, vông xêkizêc wê i vông ge vô il di vông môt xêyaa vin lecên vô il, di vông il nilôd xovô môt yuu kiyang nivîha ên nêb il timu vô.

⁸ Anutu vông xêkizêc wê i vông ge vô il, om ông nim i o léc yoc ên Apumtau Anutu kiyang wê ông ob nêl ge lêm. Di ông nim i o léc yoc ên a ên wê tibii tung a lam dô vac kalabuhu lec Apumtau lê ge lêm. Nge, ông kilê viyin lec xolac hixôn a, di le xêkizêc vac viyin tige ya xêkizêc wê Anutu vông vô ông ge.

⁹ Anutu vô il vêl ên il nêd nipaên di tyuc il ên nêb il timu vô môt ngibua wê i vông ge. Léc o vô il vêl ên il nêd nipaên ên yuac ti wê il vông ge lêm. Nge, ilage wê Anutu gên o tung lag yuu kibun lêm ge, od ici va xo vîgwe pisiv ên il di xovô pyap ên nêb Yesu Kilisi ob yib ên il nêd nipaên.

¹⁰ Di gwêbaga môt wê Anutu xo vîgwe pisiv ên il ge yêp seac vô il, ên wê Yesu Kilisi lam yib di vô il vêl ên il nêd nipaên ge. Yesu kitya xêkizêc wê yibên vông ge vêl di vông xolac nivîha vô il ên nêb kiyang wê nêbê il ob dô madvîha luta ge i yêp seac vô il.

¹¹ Anutu vinoo a ên nêb a tu sinale di la nêl xolac vô xomxo di tixuu he ya xolac tige.

¹² A vông yuac tibêge om tibii vông viyin wê a tulec gwêbaga ge vô a. Léc a nig o yoc ên viyin

tige lêm, ên a xovô xomxo ti wê a vông i vin i ge, di a xovô ên a nêbê xomxo tyo tiyi wê ob viac yuac wê vông vac a vigêg ge i tiyi buc vihati di i miloc vô buc wê Yesu obêc vena lec ge.

¹³ Ông timu vô kiyang nôn wê a nêl vô ông mi ông ngô ge, di vông i vin Yesu Kîlisi xêkizêc ta, di ông xêmyaa i vin lec i, ên ông tu Kîlisi xe pyap.

¹⁴ Myakîlôhô Ngibua dô vac il nîlôd, om ông viac kiyang nôn wê Anutu vông vac ông vigêm ge i nivîha ya xêkizêc wê Myakîlôhô Ngibua vông ge.

¹⁵ Timoti, ông xovô pyap ên ông nêbê Piselas yuu Hemosenis hixôn xomxo vông vinên vihati wê dô vac vigwe levac Esia ge, he sea a.

¹⁶ Lêc Onesipolas ge, a kitaa vô Apumtau lec i bêga bê i xo vigwe pisiv ên Onesipolas yuu vinê di nue, ên mi ngidu a xôn di vông a nîlôg vô nivîha lu tîbeac di ni o yoc ên wê a lam dô vac kalabuhu ga lêm.

¹⁷ Nge, buc wê Onesipolas val vigwe Lom ga ge od vông yuac levac lec myagên a mi val yêvô a.

¹⁸ Om a kitaa vô Apumtaubêga bê i xo vigwe pisiv ên Onesipolas vô buc timuên wê Yesu obêc vena ge. Ông xovô pyap ên ông nêbê buc ilage wê a la dô Epesas ge Onesipolas mi ngidu a xôn ya môt nivîha tîbeac.

2

Il tiyi xochê Yesu Kîlisi nue vevac

¹ A nug Timoti, Yesu Kîlisi vông vizid nivîha vô ông pyap om ông hêm vizid wê i vông ge xôn pîlihi di le xêkizêc ya.

² Kiyang vihati wê a nêl vô xomxo tibeac di ông ngô hixôn ge, ông vông kiyang tigeê vô xomxo wê ob ngô di viac niviha ge ên he i loc nêl kiyang tigeê vô xomxo ya ên he i ngô hixôn.

³ Ông le xêkizêc i tiyi xocbê Yesu Kîlisi nu vevac ti wê vông i yuac niviha ge, di ông kilê viyin hixôn xe lec yuac tige.

⁴ Xomxo ti wê kô yuac vevac ge ob vông yuac bangwe hixôn lêm. Nge, ob vông nilô vô yuac vevac tived ên nêb tibii levac wê viac i ge i yê yuac wê i vông ge niviha.

⁵ Di xomxo ti obêc nêb tup mi nginoo ge od ob tup i tiyi môp wê ob kô nôn ge. Ên obêc ma ge od ob mîla kô nôn wê tup ên ge lêm.

⁶ Di xomxo ti obêc xin vê vac yuac di viac yuac niviha ge od ob kô nôn mi ya tax.

⁷ Om ông xovô kiyang tiga wê a nêl ga, ên Apumtau ob vông xovôên vô ông ên ông xovô kiyang vihati kehe.

⁸ Ông xovô kiyang lec Yesu Kîlisi i tii vac. Yesu pum lec Devit di yib di kidi lec maviha vac yibên. Kiyang tiga xolac niviha wê a mi nêl ge.

⁹ Lêc tibii yê a nipaên ên xolac tige, om vông viyin vô a di ku a xôn ya sen di vông a lam dô vac kalabuhu ga tiyi xocbê tibii nipaên ti. Lêc he tiyiên ma wê he ob ku Anutu kiyang xôn ge.

¹⁰ Mêgem a le xêkizêc ta vac viyin, ên a nêb xomxo wê Anutu vînoo he ên nêb he i tu i nue ge he i ngô xolac di vông i vin Yesu Kîlisi di dô maviha hixôn i vac Anutu ben lag puunê luta lêc luta.

¹¹ Kiyang tiga nôn bêga ên nêbê

“Il obêc xib hixôn i ge od il obêc dô madviha hixôn i.

¹² Il obêc le xêkizêc vac vîyin ge od il ob tu levac mi dô hixôn i. Lêc il obêc yax i vun ge od i êno ob yax il vun.

¹³ Il obêc sea vông vinên wê il vông ge od i ob sea il lêm, ên o tiyi wê ob pilepac kiyang wê i vông ge lêm.”

Xomxo wê vông Anutu yuac vô nivîha ge

¹⁴ Ông nêl kiyang tige vô xomxo ên he i xovô i tii vac nang, di ông le Apumtau manôn di nêl vô he bê he i o lêc vông vevac vông lec kiyang vaxvax lêm, ên môp tibêge ob vô nôn nivîha vô he lêm. Nge, ob vông he wê ngô kiyang tige vô nipaên.

¹⁵ Ông vông yuac nivîha ên Anutu i yê ông nivîha i tiyi xocbê i nu yuac ti wê ông nêl xolac wê nôn ge bôbac di ông nim o yoc ên yuac tige lêm ge.

¹⁶ Ông kol ông ên kiyang vaxvax wê nôn maên ge. Ên kiyang tige ob didii xomxo la vac nipaên di he ob vô nîmi vô Anutu kiyang, di ob vông môp tige vô levac.

¹⁷ Kiyang nipaên wê he nêl ge ob vô levac tiyi xocbê kityax wê ob vô levac mi ya xomxo ninivi ma vêl ge. Haimenias yuu Pailitas, yuu mi vông bêge.

¹⁸ Yuu sea kiyang nôn di nêl kiyang kityooên bêga ên nêbê, “Il kidi lec vac yibên pyap.” Yuu mi nêl bêge mi xomxo vông vinên ya ngô, om vông vinên wê he vông ge vô nipaên.

¹⁹ Lêc Anutu xolac le xêkizêc xocbê teac le xêkizêc ge. Xolac bo ti nêl bêga ên nêbê, “Apumtau xovô xomxo wê tu i nue ge pyap.” Di ngwe nêl bêga ên nêbê, “Xomxo ti obêc nêl ên nêbê i tu Apumtau nu ti ge od i vô nîmi vô môt nîpaên vîhati.”

²⁰ Vac xumac levac ti pile yuu dêg wê silva yuu gol ge vaci o dô vac lêm. Nge, dêg kibun yuu pile xax le vac hixôn. Dêg yuu pile ya vông yuac nîvîha, di ya dô vaxvax.

²¹ Mêgem xomxo vông vinên ti

obêc vô nîmi vô kiyang yuu môt nîpaên di dô nîvîha ge od tiyi xocbê pile yuu dêg wê vông yuac nîvîha ge, ên xomxo tige vông nîlô la vô Apumtau di viac i pyap tiyi wê ob vông yuac nîvîha wê Apumtau vông vô i ge vîhati.

²² Om ông le teva ên môt nîpaên vîhati wê yêp vac xam ngîvîhi nîlôm ên xam nêb xam ob vông ge. Di ông vông nîlôm i loc vô môt nîvîha, di môt vông vinên, di môt xêyaa vin lecên, di môt malehe hixôn. Om ông hixôn xomxo vîhati wê xam xôn nîlôm vô paha lec di xam kitaa vô Apumtau ge, xam vîhati timu vô môt tibêgee.

²³ Ông kol ông ên kiyang vaxvax wê xovôên nîvîha ti o yêp vac lêm ge, ên kiyang tibêge wê ob vông xomxo kunacma di vông vevac vîma.

²⁴ Xomxo ti obêc tu Apumtau nu yuac ge od i o vông vevac vô xomxo ya kiyang lêm. Nge, i lum nêl kiyang vô xomxo di tîxuu he i nîvîha ya xolac, di xêyaa i o vô myavînê vô xomxo wê vông viyin vô i ge lêm,

²⁵ di i lum nêl kiyang vô he wê vông vevac vô xolac ge di titô he, ên mêd Anutu ob vông he pilepac he di he ob xovô kiyang nôn.

²⁶ Ilage Seten ku he xôn vac leac wê i vông ge di vông he timu vô ici va kiyang. Lêc he obêc xovô Anutu kiyang nôn ge od he piyôp obêc yêp nivîha di he ob sea leac wê Seten ku he xôn ya ge.

3

Môp nipaên wê ob val vô buc timuên ge

¹ Ông xovô bêga bê vô buc myahîpu ge od viyin tibeac obêc val.

² Ên xomxo ob timu vô môp nipaên bêga nêbê he ob xovô heche va, di he ob doma vô mone, di he ob yong heche va lê, di he ob kô he lec vô xomxo, di he ob nêl xomxo lê nipaên, di he ob vô ninya kitu vô tae mae, di he ob pimil xomxo wê ngidu he xôn ge lêm, di he ob la vac Anutu kiyang kwa ngibi lêm,

³ di he ob vông nivîha vô lie lêm, di he xêyaa ob vô myavinê lec kiyang di hôm xôn, di he ob nêl kiyang nimi vaxvax, di he ob kol he ên môp nipaên wê he ninivi xovô ge lêm, di he ob vông xomxo vô nipaên, di he ob vông vevac vô môp nivîha vîhati,

⁴ di he ob kityoo lie di vông he la vac xomxo nipaên vigê, di he ob timu vô piyôp nipaên wê he vông ge lutibed, di he ob xovô heche va ên nêbê he xomxo levac, di he xêyaa ob vin lec Anutu lêm. Nge, he xêyaa ob vin lec môp toto wê ninivi xovô ge,

⁵ di he ob yê da di kitaa lê, lêc he nêl vac mya pileva, ên he vô nimi vô Anutu hixôn xêkizêc wê i vông ge. Timoti, ông le teva ên he wê mi vông môp nipaên tibêgee.

⁶ Ên he ya nêl xolac kityooên vô vêx wê o vông i vin xêkizêc lêm ge. Vêx tigege mi vông môp nipaên wê vông he nilô vô viyin ge, di he vông piyôp la vô kiyang nipaên tibeac.

⁷ Vêx tigege mi ngô kiyang viyang viyang ge ên nêb he ob kô xovôên lec, lêc he o tiyi wê he ob xovô kiyang nôn ge lêm.

⁸ Ilage vux yuu lê nêbê Janis yuu Jamblis, yuu vông vevac vô Moses vac vigwe Isip. Di gwêbaga xomxo tigege wê nêl kiyang kityooên vô vêx ge he tiyi xocbê Janis yuu Jamblis, ên he vông vevac vô kiyang nôn, di piyôp wê he vông ge vô nipaên di he sea vông vinên wê nôn ge.

⁹ Lêc môp kityooên wê he vông ge ob vô levac lêm. Ên xomxo ob yê môp wê he vông ge ên nêbê môp yacyac, tiyi xocbê xomxo yê môp wê Janis yuu Jamblis vông ilage ên nêbê môp yacyac.

Pol nêl vô Timoti ên nêb i hôm Anutu kiyang xôn pilihi

¹⁰ Ông dô hixôn a ila, om ông xovô kiyang pyap wê a tixuu xomxo ya ge, di ông xovô môp vihati wê a mi timu vô ge, di piyôp wê a vông ge, di môp vông vinên wê a vông ge, di ông xovô wê a mi lum nêl kiyang malehe vô xomxo, di a xo vigwe pisiv ên he, di a le xêkizêc di kilê viyin vihati,

¹¹ di ông xovô môp nipaên vihati wê tibii vông vô a ge hixôn viyin levac wê tulec a vac vigwe

Antiok yuu Aikoniam yon Listla ge. A tulec viyin yuu myavinê mabu yocên, lêc Apumtau vô a vêl ên viyin tigege vihati.

¹² Vixôhilôg nôn, tibii ob vông viyin yuu myavinê vô xomxo vihati wê nêb ob timu vô môp wê Yesu Kilisi vông ge.

¹³ Dî xomxo nipaên hixôn xomxo kityooên ob vông môp nipaên vô levac, dî nipaên wê he vông ge ob viyum he xôn, dî he ob kityoo xomxo tibeac, lêc Seten ob kityoo he.

¹⁴ Lêc ông mô, kiyang nôn wê ông kô dî vông i vin xêkizêc ge, ông hôm kiyang tige xôn pilihi, ên ông xovô xe vêx yuu vux wê xe tixuu ông ya kiyang tige,

¹⁵ dî ông xovô ên ông nêbê ilage ông gên dô nipwo, lêc ông kô xovôên lec Anutu kiyang dî i val tyip lec gwêbaga hixôn. Anutu kiyang tiyi wê ob vông xovôên vô xomxo ên he i vông i vin Yesu Kilisi dî i kitya he nêb nipaên vêl.

¹⁶ Anutu kiyang vihati wê yêp vac kipihac xolac ge, Anutu vaci vông vô xomxo mi he kivuu. Anutu kiyang tige nivîha tiyi wê ob vông xovôên vô il, dî ob hîlung il nêd nipaên vô il, dî ob titô môp wê il vông ge, dî ob tixuu il ya môp wê Anutu yê nêb nivîha ge.

¹⁷ Om Anutu vông xolac vô il ên nêb i vông xovôên yuu xêkizêc vô il wê Anutu nue ge tiyi wê il ob vông yuac nivîha vihati ya ge.

4

Pol nêl vô Timoti ên nêb i nêl Anutu xolac nôn kitong

¹ Yesu Kìlisi obêc yaxên xomxo vihati nêb kiyang, he wê dô mavîha hixôn he wê yib ge, di Yesu Kìlisi ob vena le seac di tu xomxo vihati nêb levac wê ob viac he luta ge. Om a le vô Anutu yuu Yesu Kìlisi manôn di a nêl vô ông bêga bê

² ông nêl Anutu kiyang i tiyi buc vihati, di xomxo ob nêb ngô me ngôên obêc ma ge od ông nêl xolac vô he. Ông nêl xolac vô he i tiyi wê he ob ngô mi xovô di vông i vin, di ông nêl he nêb nipaên kitong vô he ên i kitiv he nêlô di he i pilepac he vêl ên môp nipaên wê he vông ge, di ông nêl kiyang wê ob ngidu he xôn ge, di môp wê ông ob lum nêl kiyang vô xomxo di tixuu he ya xolac ge, le i lêc sea môp tige lêm.

³ Ên obêc buc timuên ge od xomxo ob nêb ngô kiyang nôn lêm. Nge, he ob timu vô môp wê heche va xovô ge, di vînoo xomxo wê ob tixuu he ya kiyang vaxvax wê he ngô nêb nivîha ge.

⁴ Di he ob vô nîmi vô kiyang nôn di vô nînya vô kiyang wê pivulac pileva ge.

⁵ Lêc ôcông va, ông piyôp i yêp nivîha i tiyi buc vihati, di ông kilê viyin, di ông loc nêl Kìlisi kiyang vô tibii madîluhu ên he i ngô di vông i vin. Yuac wê Anutu vông vac ông vigêm ge, ông vông yuac tige vihati i vô nôn lec.

⁶ Ên a ga, tibii madîluhu nêb ob hi a xib, om a hi ob kipyax sea di a ob tu xocbê daa vô Anutu. Om buc wê a ob xib di sea kibun ga ge vô kwabo lec.

⁷ Vevac nivîha wê a vông ya xolac ge, a vông pyap. A tup vac môp vông vinên di la tiyôl lec myahîpu. Di a o sea vông vinên wê a vông ge

lêm. Nge, a hòm xôn pilihi.

⁸ Om Apumtau viac nôn nivîha pyap ên nêb a ob kê. Nôn tige bêga nêbê i ob yê a nêb a xomxo nivîha. Om Apumtau wê yaxên xomxo ya môp bôbac ge obêc vông nôn tige vô a vô buc wê obêc vena lec ge. Lêc ob vông vô aca va tîbed lêm. Nge, ob vông vô xomxo vîhati wê he xêyaa vin lec ên nêb he ob yê i vô buc wê obêc vena lec ge.

Kiyang viwen timuên

⁹ Timoti, ông seb lam vô a lutîbed,

¹⁰ ên Klesens la vîgwe Galesia, di Taitas la vîgwe Dalmesia. Dimas vông nilô la vô susu kibun ga om sea a dô di la vîgwe Tesalonaika.

¹¹ Luk tîbed wê dô hixôn a. Om ông loc kê Mak di muu lam vô a, ên Mak tiyi wê ob ngîdu a xôn vac yuac ge.

¹² Tikikas ge, a vông i la Epesas.

¹³ Ilage wê a la vîgwe Tloas ge od a sea a saket levac dô vac Kapas ben. Om buc wê ông obêc lam vô a ge od ông loc kê a saket tige mi lam, di kê a kipihac hixôn, di le i lêc lungên a kipihac wê he vông ya bwoc ninivi ge lêm. Nge, ông kê kipihac vîhati mi lam hixôn.

¹⁴ Aleksanda wê vông yuac lec ain siên ge vông nîpâên levac vô a, om Anutu obêc vông myaviwen nîpâên vô i lec nîpâên wê i vông vô a ge.

¹⁵ Om ông êno, ông viac ông ên xomxo tige, ên xêyaa vô myavinê ên nêb ob le vac kiyang nivîha wê il mi nêl ge xôn.

¹⁶ Vô buc wê a la le vac kot taxlee ge, xomxo ti o le hixôn a di nêl kiyang wê ob ngîdu a xôn

ge lêm. Nge, he vihati sea a dô. Mêlêc a kitaa vô Anutu ên a nêbê i kitya he nê nipaên wê he vông vô a ge vêl.

¹⁷ He vihati sea a mi la, lêc Apumtau dô hixôn a di vông xêkizêc wê i vông ge vô a, om a nêl Kîlisi xolac vihati yêp seac di tibii madiluhu wê lam le vac kot ge vihati ngô. Om tiyi xocbê Anutu vô a vêl ên noo laion mya.

¹⁸ Apumtau obêc vô a vêl ên nipaên vihati wê xomxo nêb ob vông vô a ge, di obêc kô a mi la vac ben lag puunê di obêc viac a luta. Om il ob pimil i lê i yêp luta lêc luta. Nôn.

¹⁹ Ông nêl vô Akwila yuu vinê Plisila hixôn Onesipolas he vinê nue bêga bê a nêl vidiiên vô he.

²⁰ Elastas gên dô vac vigwe Kolin, di Tlopimas vông yidac ti om a sea i vac vigwe Mailitas mi i dô.

²¹ Ông seb lam vô a lutibed, di le i lêc bin buc wê lun yuu ningigoên ob val lec ge lêm. Yubyulas yuu Pyudens di Lainas yuu Klodia hixôn lime vông vinên vihati vac vigwe tiga, he nêl vidiiên vô ông.

²² Apumtau i ngidu ông xôn, di vizid nivîha wê i vông ge i viac xam vihati.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8